

Sjednica Predstavničkog doma Parlamentarne skupštine BiH

Imenovan Savjet ministara

Imenovanje Vijeća ministara BiH potvrđeno je sa 24 glasa "za", i to poslanika iz SDS-a, PDP-a, SDA, HDZ-a i tri poslanika Stranke za BiH



Novi Savjet ministara

FOTO N. UGLJEŠA

SARAJEVO - Poslanici Zastupničkog doma Parlamentarne skupštine BiH tijesnom većinom imenovali su jučer članove novog saziva Vijeća ministara. Tačnije, imenovano je sedam ministara i sedam zamjenika ministara, a jedino nisu imenovani ministri i zamjenici u Ministarstvu pravde.

Imenovanje Vijeća ministara BiH potvrđeno je sa 24 glasa "za", i to poslanika iz SDS-a, PDP-a, SDA, HDZ-a i tri poslanika Stranke za BiH.

Protiv je bilo devet poslanika (SDP BiH, SNSD, SRS RS, SP RS), a uzdržanih sedam i to iz redova Bosanske stranke, Narodne stranke "Radom za boljitak", Socijaldemokratske unije i tri poslanika Stranke za BiH.

"Razlog zbog kojeg nisam predložio imenovanja ministra i zamjenika ministra pravde je što još uvijek od OHR-a nisam dobio saglasnost za predložene kandidate. Ipak, nadam se da će ova imenovanja biti obavljena na narednoj sjednici ovog doma", kazao je Adnan Terzić, predsjednik Vijeća ministara.

Za ministra i zamjenika ministra vanjskih poslova imenovani su Mladen Ivanić i Lidija Topić. Prvi i drugi čovjek Ministarstva sigurnosti su Bariša Čolak i Dragan Mektić.

Ministar spoljne trgovine i ekonomskih odnosa i njen zamjenik su Mila Gadžić i Momir Tošić. Na čelo Ministarstva za Trezor i finansije imenovana je Ljerkica Marić, a njen zamjenik je Jusuf Kumalić. Za ministra i zamjenika ministra komunikacija i transporta imenovani su Branko Dokić i Haris Bašić.

Safet Halilović i Zoran Tešanović imenovani su za ministra i zamjenika ministra civilnih poslova. Za ministra i zamjenika ministra za ljudska prava i izbjeglice imenovani su Mirsad Kebo i Ivica Marinović.

TERZIĆEV EKSPOZE: U svom ekspozu, koji je podnio na ovoj sjednici, Terzić je iznio trenutno stanje u zemlji. Prema njegovim riječima, on i Vijeće ministara, na čijem je čelu, preuzimaju dužnost u momentu kada je stopa nezaposlenosti 40 posto, kada se svaki peti stanovnik BiH, prema međunarodnim mjerilima, smatra siromašnim, kada sistem socijalne zaštite gotovo da ne funkcioniše i slično.

KANDIDATI SDS-a ZA MINISTRA PRAVDE

Kako nezvanično saznajemo, SDS je za ministra pravde u Savjetu ministara BiH predložio Biljanu Marić, aktuelnog ministra pravde u RS, Mlađena Mandića, zamjenika ministra pravde RS i Dragomira Dumića.

Dumić je advokat iz Tuzle, nastanjen u Bijeljini i, prema nekim procjenama, ima najviše šanse kao kandidat za ministra pravde. Dumić je bio i predsjednik Demokratske stranke RS i sa te funkcije je prošle godine pristupio SDS-u.

PODIJELJENA STRANKA ZA BiH

Velika rasprava se povelila o načinu glasanja o imenovanju članova Vijeća ministara. Naime, u toku diskusije o ekspozu, Beriz Belkić, poslanik Stranke za BiH, zatražio je da se poslanici izjašnjavaju o svakom ministru pojedinačno, kao i objašnjenje da li je visoki predstavnik odobrio imenovanja i zamjenika ministara, kao što je to učinio za ministre. Međutim, to nije prihvaćeno i glasalo se u "paketu".

Najzanimljivije je bilo izjašnjavanje poslanika Stranke za BiH. Naime, osim Belkića, Nijaz Duraković i Azra Hadžiahmetović su bili uzdržani, dok su Izet Žigić, Munib Jusufović i Adem Huskić dali podršku odluci o imenovanju.

Ostalo je nejasno da li je ovakva podijeljenost prilikom glasanja znak unutarstranačkog sukoba, ili se, ipak, radilo o smišljenoj "igri" stvaranja alibija zato što je Ivanić, ipak, izabran za šefa diplomatije.

Kao prioritete u radu Vijeća ministara izdvojio je očuvanje makroekonomske stabilnosti, uspostavu jedinstvenog ekonomskog prostora, reformu i racionalizaciju pravosudnog sistema, unapređenje poslovne klime, jačanje institucionalnog okvira na svim nivoima, a posebno na državnom, okončanje procesa privatizacije, uspostavu vladavine prava, integraciju BiH u svjetske tokove, približavanje Evropskoj uniji i uspostavu adekvatnog i održivog sistema socijalne zaštite.

"Ovo Vijeće ministara, zajedno sa entitetskim vladama, ima jasan cilj: da BiH postane evropska zemlja, integrirana u EU i globalnu ekonomiju mnogo više nego što je to danas. Transformacija ekonomije ovisne od donatorske pomoći, ka samoodrživoj ekonomiji, u kojoj će privatni sektor i poduzetništvo igrati najznačajniju ulogu, povratak kreditne sposobnosti zemlje na međunarodnom tržištu kapitala, te sve manja ovisnost od kredita Svjetske banke, važni su koraci u tom pravcu", istakao je Terzić.

TERZIĆ NIJE ODGOVORIO LAGUMDŽIJI: U toku rasprave o ekspozu i predloženom sastavu Vijeća ministara, za riječ su se uglavnom javljali predstavnici opozicionih stranaka, a ubjedljivo najduža "seciranja" dokumenta, kojeg je prezentovao Terzić, održali su Nikola Špirić, poslanik SNSD-a i Zlatko Lagumdžija, poslanik SDP-a.

Jedno od pitanja na koje se Lagumdžija

najviše "okomio", bila je saradnja sa Haškim tribunalom za ratne zločine, podvlačeći da saradnja sa ovom sudskom institucijom u ekspozu nije spomenuta niti jednom.

"Citam u novinama kako je, navodno, visoki predstavnik za BBC izjavio da međunarodna zajednica nije postigla politički dogovor o hapšenju Radovana Karadžića. Prije nekoliko dana je prenesena izjava, također, visokog predstavnika za BBC, da hapšenja Radovana Karadžića neće biti dok ima podršku u narodu. Ovdje je predložena rezolucija o saradnji sa Haškim tribunalom, koja nije usvojena, a sada ta saradnja nije spomenuta u ekspozu. Ja ove stvari dovedim u vezu i pitam predsjedavajućeg zašto saradnju sa Tribunalom nije spomenuo u ekspozu", naglasio je Lagumdžija.

Međutim, ostao je bez odgovora na ovo pitanje. Razlog za to je, prema Terzićevim riječima, to što je Lagumdžija unaprijed najavio da neće podržati imenovanje Vijeća ministara.

Jučer je, nakon imenovanja, trebalo da bude održana zajednička primopredajna sjednica starog i novog saziva Vijeća ministara, ali je, zbog dužine rasprave o imenovanju, odgođena za srijedu, 15. januara.

Prije rasprave o imenovanju Vijeća ministara poslanici u Zastupničkom domu razmatrali su izvještaj o radu prošlog saziva Vijeća ministara. Iako su ovom izvještaju nadene mnoge zamjerke, on je ipak usvojen, jer su stranke, sada već bivše Alijanse za promjene, podržale ovaj dokument. Neposredno prije nego što će podnijeti izvještaj, Dragan Mikerević, predsjedavajući starog saziva Vijeća ministara je, o mogućim posljedicama neusvajanja ovog dokumenta, izjavio:

"Pa šta i ako ga ne usvoje? Nema nikakvih posljedica. Uostalom, ni mi nismo usvojili njihov izvještaj, odnosno posljednji izvještaj starog saziva Vijeća ministara".

A. ŠARENKAPA

Sarajevo

PREDSJEDNIŠTVO BiH U PETAK O "ORLU"

SARAJEVO - Predsjedništvo BiH trebalo bi da u petak, 17. januara, razmotri Konačan izvještaj Vrhovnog savjeta odbrane Republike Srpske o aferi "Orlo".

Neimenovani zvaničnik Predsjedništva BiH potvrdio je Feni da članovi Predsjedništva razmatraju dostavljeni skraćeni izvještaj, a da će na sjednici zauzeti zajednički stav o tom pitanju.

"Predsjedništvo će u svom stavu, najvjerojatnije, insistirati na uspostavljanju mehanizama za sprečavanje sličnih afera u budućnosti, kao i na efikasnijoj državnoj kontroli izvoza oružja i vojne opreme", rekao je isti izvor.

Vrhovni savjet odbrane RS dostavio je 31. decembra ove godine Konačni izvještaj komandantu SFOR-a u BiH Vilijamu Vordu, u kojem je kompletna istraga o aktivnostima Remontno-vazduhoplovnog zavoda "Orlo".

Javnosti su prezentovani tek dijelovi obimnog izvještaja, u kojem su, na 1.614 stranica, sumirani konačni nalazi u vezi s ovom aferom, koji se temelje na osnovu izvještaja istražnih organa RS, prvenstveno Poreske uprave i Kancelarije glavnog revizora.

Prezentujući izvještaj, Dragan Čavić, predsjednik RS, kazao je da je osnov za kršenje Rezolucije Savjeta bezbjednosti UN od strane "Orla" pronađen 1997. godine u nizu naredbi i odluka tadašnjeg predsjednika RS Biljane Plavšić, kojima su vazduhoplovno-remotni zavodi direktno stavljeni pod nadležnost i direktno potčinjeni Vojsci RS.

On je rekao da je izvoz vojne opreme iz "Orla", odnosno dijelova za iračke borbene avione MIG 21, vođen u strukturama vojske pod nazivom projekat "Zora" i da je sa aktivnostima koje su tekle do septembra 2002. godine bio upoznat dio visokih oficira u Generalštabu.

Savez samostalnih sindikata BiH

TRAŽE PARE OD PRIVATIZACIJE ZA SOCIJALNO ZBRINJAVANJE

SARAJEVO - Predsjednik Saveza samostalnih sindikata BiH, Edhem Biber, uputio je juče pismo federalnom premijeru, Aliji Behmenu, u kojem zahtijeva da se dio sredstava iz privatizacije usmjeri za socijalno zbrinjavanje radnika.

Parlament FBiH još je u julu 2002. godine donio zaključak da se dio ovih sredstava usmjeri za zbrinjavanje radnika, koji su prema članu 143, Zakona o radu, ostali bez posla. Prema ovoj odluci, Vlada FBiH trebalo je da krene u realizaciju ovog zaključka još 1. septembra 2002. godine.

"Mi smo u ime Sindikata nekoliko puta upozoravali Vladu na ovaj zaključak, ali smo ostajali bez odgovora i konkretnih aktivnosti. Naknadno smo došli do saznanja da se sredstva iz privatizacije usmjeravaju na jedan račun, a potom se koriste za otplatu vanjskog duga. Sindikat je apsolutno protiv trošenja sredstava u tu svrhu", rekao je Biber.

Ukoliko dobije potvrdu od federalnog premijera da se sredstva ne usmjeravaju u proizvodnju zbog uslovljavanja iz Međunarodnog monetarnog fonda, Biber će u ime Sindikata uputiti pisma protesta i predstavnicima međunarodne zajednice.

N.K.